



*Rabu , 27 April 2022*

**Ogen: Yakob 4:13-16**



**IBEREKEN TUHAN KESEMPATEN**



Lagu rohani si judulna hidup ini adalah kesempatan, enterem kalak metehsa bage pe rusur iendeken. Lagu enda mabai ras mpersingeti kita gelah makeken paksa si kentisik enda alu mehuli janah banci jadi pasu-pasu. Amin nterem kalak ngendekenca tapi labo bage teremna kalak si ngasup makeken pesan si isehken arah syair lagu enda man bana. Sabap labo menukah kalak ngidah ras makeken erbage kesempatan si lit dengen si reh alu mehuli i bas kegeluhenna.

Jakub empersingeti kita si ngoge suratna enda gelah ula meganjang rukur i bas erbahan erbage perencanaan. Si meganjang rukur, la erpersukuten man Dibata i bas erbahan perencanaan i bas kegeluhenna. Kebeluhenna akapna ngaturken sinasa lit i bas geluhna. kalak si bage me ikataken megombang subuk man jelma sekelewetna terlebih man Dibata. Sabap la teralokensa maka kerina iteruh kuasa ras pengaturen Dibata kegeluhen i doni enda.

I bas dampar sideban ateta ngidah maka kalak si erbahan perencanaan ntah pe sura-surana enda tuhu-tuhu makeken kesempatan alu mehuli. Makeken waktu guna dahin si banci iukuri ras ilakokenna. Arah rencana enda pe kepe teridah kuga ia memaksimalken kegeluhen si idalanina paksa e. Kesempatan e Tuhan merekenca, kesempatan e la terjeng waktu si banci ipake tapi pe kepentaren si ibereken DIBata. Kesempatan la seri ras duit si banci itabung. Kesempatan adi la ipakeken alu mehuli ras ertanggungjawab lanai terulahi. E maka adi la sipaken kesempatan si reh e alu mehuli pasti bene. Kalak si makeken kesempatan alu mehuli tentunya ialokenna ras inanamina ulihna. Man banta sekalak-sekalak enggo ibereken Dibata kesempatan, ula sia-siaken, ula terkari-kari. Kalak simakesa alu payo pasti ngenanmi keriahen ukur.

*☞ Kesempatan seh kal ergana dengen la tertukur alu duit*